

**05 MAI
RUGĂCIUNEA 103
SF.CUVIOS-MUCENIC
EFREM DE LA NEA MAKRI**

Молитва

О, преподобномучениче Ефреме, новый чудотворче и великий миру светильниче! Ты от юности Христа возлюбив, Тому Единому вседушно последовал еси. Жития же монашескаго взыскуя, на горе Амомон вселился еси и тамо, плоть распиная и непрестанную молитву в сердце твоём совершая, многими слезами душу твою от страстей очистил еси.

Сего ради уготовася тебе путь превосходнейший, не токмо в Сына Божия веровати, но и по Нем страдати. Темже муки горчайшия за Христа радостно приял еси и, никакоже агарян нечестивых устрашився, на долзе времени мучения телесная терпел еси, таже, дивное мужество показуя, кровь твою, яко многоценное миро, на землю пролиал еси. Егда же безумнии агаряне, желавшии тя от Христа отринуту, узреша, яко ничтоже успевают, на древе стремглав простроша тя и палицею горящею святое тело твое прободоша. Ты же,

претрудный путь свой совершив, кротко душу твою в руке Божии предал еси.

Темже, лестницею добродетелей на небо возшел еси, достигнув возлюбленного тобою Господа. Иже прием тя, яко верного воина, увязе главу твою честную венцем нетленных славы и отре всякую слезу твою, на веки с Собою сочетавая. Кто ныне возможет разлучити тя от любви Божия? Кто исхитит у тебе светлую диадиму, дарованную Небесным Царем? Кто лишит тя вечного жительствова во граде Господнем? Воистину неотъемлемое наследие и причастие со святыми восприял еси на Небесех.

Обаче и на земли просия слава твоя, святой отче Ефреме. Аще бо и безвестно в мире сем пострадал еси и память о подвизех твоих за давностию лет пресечеса, обаче Творец всяческих, ведый тайная, в последок дней сих яви сокровенная в земли твоя мощи, подвиги твоя явлены сотвори и дарова ти велию благодать исцелений в помощь и утешение роду христианскому. Сего ради потоцы чудес источил еси, отче Ефреме, притекающим к святей твоей раце, расслабленные укрепляя, слепым зрение подавая, хромым возставляя и иными многими и неисцельными недугами содержимыя люди уврачуя. И даже до днесь вся концы вселенныя

просвещаеши многоразличными дивными чудесы и видении.

О, святче Божий, не остави и нас, убогих, оскудевших в вере, любви и добрых делах, возстави нас падших в страсти, даруй нам слезы покаяния, утверди твоею крепкою к Богу молитвою, исцели наша недугующия души и телеса. Просвети наш ум последовати евангельским заповедем, возжзи в сердцах наших неугасимую любовь ко Спасу и ближним нашим, даруй нам благими делы прославляти Отца нашего Небеснаго, Емуже подобает всякая слава, честь и поклонение со Единородным Его Сыном и с Пресвятым и Благим и Животворящим Его Духом, ныне и присно и во веки веков. **Аминь.**